

**ՀՀ ԿՐԹՈՒԹՅԱՆ, ԳԻՏՈՒԹՅԱՆ ԵՎ ՍՊՈՐՏԻ ՆԱԽԱՐԱՐՈՒԹՅՈՒՆ  
ԱՎԱՐՏԱԿԱՆ ՀԵՏԱԶՈՏԱԿԱՆ ԱՇԽԱՏԱՆՔ**



<<Երևանի Լեոյի անվան հ.65 ավագ դպրոց>> ՊՈԱԿ

**ԱՎԱՐՏԱԿԱՆ ՀԵՏԱԶՈՏԱԿԱՆ ԱՇԽԱՏԱՆՔ**

ԹԵՄԱ՝ ՍՈՎՈՐՈՂՆԵՐԻ ՄԵՋ ԱՐԺԵՔԱՅԻՆ ՀԱՄԱԿԱՐԳԻ ՁԵՎԱՎՈՐՈՒՄԸ

ՀԱՍԱՐԱԿԱԳԻՏՈՒԹՅՈՒՆ ԱՌԱՐԿԱՅԻ ԴԱՍԱՎԱՆԴՄԱՆ ԸՆԹԱՅՔՈՒՄ:

Կատարող՝ Արև Մկրտչյան

Ղեկավար՝ Արմինե Սաֆարյան

## Բովանդակություն

Ներածություն.....	3
<b>Գլուխ1</b> Արժեհամակարգի ձևավորումը ուսումնական գործընթացում.....	5
<b>Գլուխ2</b> Սովորողների մեջ արժեհամակարգի ձևավորումը որպես արդի մանկավարժության կարևոր պահանջ.....	7
<b>Գլուխ3</b> Արժեհամակարգի դասավանդման մեթոդիկան հասարակագիտություն դասաժամերին.....	9
<b>Գլուխ 4.</b> <<Կոռուպցիա>> թեմայի ուսուցման մեթոդները որպես արժեհամակարգի ձևավորման կարևոր միջոց.....	11
4.1 Խմբային աշխատանքների կազմակերպման առանձնահատկությունները, ուսումնական գործընթացի տեսակները.....	13
Եզրակացություն.....	17
Օգտագործված գրականության ցանկ.....	18

## Ներածություն

Թեմայի արդիականությունը .

Կրթության մասին խոսելիս մենք հաճախ օգտագործում ենք արժեքներ հասկացությունը: Արժեքը հնարավոր չէ ստանալ հեշտությամբ. այն պետք է վերապրել, զգալ և գիտակցել: Առանց արժեքների կյանքը դատարկ է: Հեշտ, առանց կորուստների և հաղթահարումների ապրելն երբեք չի երջանկացնում հենց այն պատճառով, որ չի բերում արժեքների ձևավորման: Երբ փլուզում են արժեքները, խախտվում է համակեցությունը և տարածվում անբարոյականությունը, հանցագործությունները դառնում են համատարած, կյանքը կորցնում է իմաստի զգալի մասը: Հենց այս պատճառով է, որ կրթության հենքը և գլխավոր իմաստը պետք է դառնա արժեհամակարգի ձևավորումը: Դպրոցը պետք է լինի օրինակելի տարածք, ուր աշակերտները սովորում են դրանց համապատասխանել: «Արժեքն» այն է, ինչ գնահատելու, կողնորոշվելու, հասկանալու հնարավորություն է տալիս: Կողնորոշիչներ ունենալն, անկասկած, մարդու հիմնարար պահանջումների է:

ՀՀ պետական չափորոշում որպես կրթության բովանդակային բաղադրիչ ներառված է նաև արժեհամակարգը հասկացությունը: Արժեհամակարգը մարդու բարոյական, գեղագիտական, հոգևոր, իմացական, մշակութային և էթիկական արժեքների համախումբն է, որն անհրաժեշտ է անձի ներդաշնակ, բազմակողմանի ձևավորման համար: Դպրոցի, մանկավարժի գերնպատակն է կերտել բարոյական, ազգային արժեքներով օժտված, ազգային նկարագիր ունեցող սերունդ: Այդ նպատակին հասնելու համար անհրաժեշտ է երեխայի մեջ սերմանել մեր ազգին բնորոշ բարոյական և հոգևոր արժեքները, փոխանցել մեր նախնիներից ժառանգած մեր ինքնատիպ արժեքները, նաև կրթական գործընթացի ճիշտ կազմակերպման համար կարևոր են համաշխարհային փորձի ուսումնասիրումն ու համեմատությունը: Ուստի 21-րդ դարի գերխնդիրներից է կերտել սերունդ, որ կկարողանա շարունակել ազգային լավագույն ավանդույթները, ցույց կտա նաև տարբեր մշակութային բարոյահոգեբանական արժանիքները: Մանկավարժը պետք է նպաստի մտածող

անհատի ձևավորմանը, օգնի յուրացնել ժողովրդավարական արժեքները, կսովորեցնի հարգելու, օգնելու, լսելու, քննադատելու և քննաարժեքում ան մշակույթը [1]:

Ինչպիսի՞ հասարակությունում են ապրելու մեր երեխաները վաղը: Այս հարցի պատասխանը տալիս է այն կրթությունն, որ մենք տալիս ենք այսօր: Կրթությունն առանցքային դեր ունի ապագայի ձևավորման գործում և արտացոլում է աշխարհի այն տեսակը, որն ուզում ենք ստանալ հետագա սերունդների համար: Ժողովրդավարական գործընթացներին ակտիվորեն մասնակցելու կարողության ձեռքբերումն ու պահպանումը սկսվում է վաղ մանկության շրջանում և շարունակվում է ողջ կյանքի ընթացքում:

Հանգամանքները փոխվում են և անհրաժեշտ է ,որ մարդիկ զարգացնեն առկա կարողունակությունները ու ձեռք բերեն նորերը՝ արձագանքելու իրենց ապրած միջավայրում տեղի ունեցող փոփոխություններին: Ուսումնական հասարակությունները կարևոր դեր ունեն այս հարատև գործընթացում: Երեխաների մեծ մասը հանրային տիրույթի հետ առաջին շփումն ու առնչությունն են ունենում դպրոցում, և դպրոցը պետք է լինի այն վայրը, որ տեղից սկսվում է ժողովրդավարական կրթությունը: Այն լիարժեք կրթության տեսլականն է, որը ներառում է 4 գլխավոր նպատակ՝

- սովորողին պատրաստել աշխատաշուկային
- պատրաստել կյանքին՝ որպես ժողովրդավարական հասարակության ակտիվ քաղաքացի
- ապահովել անձնական զարգացում
- ձևավորել և պահպանել որպես առաջանցիկ գիտելիքի բազա:

## **Գլուխ 1 . Արժեհամակարգի ձևավորումը ուսումնական գործընթացում**

Մանկավարժության կարևոր պահանջներից է երեխաների արժեքային համակարգի ձևավորումը: Կրթության նպատակը անհատին ոչ միայն գիտելիքներով զինելն է, այլև նրա մեջ բարոյական որոշակի հատկանիշներ ձևավորելը: Արժեքային կրթությունը ի սկզբանե կրթության անքակտելի բաղադրիչն է եղել: Ինչպես ամբողջ աշխարհում, Հայաստանում էլ այսօր արժեքային կրթությունը հասարակությանը հուզող խնդիրներից մեկն է: Մեզանում արժեքային կրթության նկատմամբ ավանդաբար ընդունված է հետևյալ մոտեցումը. դպրոցն ու ծնողները փորձում են բարոյական ժառանգությունը փոխանցել նոր սերնդին՝ նրանց մեջ լավ արժեքներ սերմանելով և հաստատելով բարոյական այլևայլ հատկանիշների ճշմարտացիությունը: Արժեքային կրթության նոր՝ արևմտյան մանկավարժության մեջ մշակված մոտեցման հիմքում մտածական հմտությունների ձևավորման սկզբունքն է: Ըստ դրա՝ աշակերտներին պետք է օգնել իմաստավորելու որոշակի արժեքներ, այսինքն՝ նրանց պետք է խրախուսել սեփական կենսափորձի և զանազան հարցադրումների միջոցով որոշել, թե իրենք ինչպիսի մարդ են ուզում դառնալ:

Ժողովրդավարությունը վերացական է այնքան ժամանակ, քանի դեռ չկա ժողովրդավարական մշակույթի կրող, իր ինքնությունն ու դիրքորոշումները ճանաչող մարդ, իրավունքի և օրենքի գերակայության կարևորությունն ընդունող, մարդկային արժանապատվությունն ու մարդու իրավունքները հարգող, դրանցով առաջնորդվող, սրտացավ քաղաքացին, նոր փոփոխությունների պատրաստ, մշակութային երկխոսությանը չդիմադրող և քաղաքակիրթ անհատ:

Հանրակրթական պետական չափորոշի ընդհանուր դրույթներում սահմանվում է չաձորոշի նպատակն ու գործառույթը<sup>[2]</sup>: Մասնավորապես նշվում է.

Հանրակրթության պետական չափորոշիչը ելնում է կարողունակությունների վրա հիմնված մոտեցումից և սահմանում է շրջանավարտներին ներկայացվող որակական

Հանրակրթության առարկայական չափորոշչային վերջնարդյունքները և օրինակելի ծրագրերը

պահանջները ըստ կրթական աստիճանների (կարողունակություններ, կոմպետենցիաներ) և ըստ կրթական աստիճանների ուսումնառության՝ ակնկալվող վերջնարդյունքներ), ուսումնական բնագավառները, դրանց բովանդակությանը ներկայացվող

պահանջները, հանրակրթական հիմնական ծրագրերի բովանդակության պարտադիր նվազագույնը, ուսումնական պլանի և առարկայացանկերի ձևավորման հիմնական սկզբունքները, սովորողների գնահատման ձևերը, սանդղակը, հաշվառման կարգը:

Այս դրույթում առանցքային հասկացություններից է <<կարողունակություն>> բառը, որն էլ կառուցում է չափորոշիչ բովանդակության մի շարք մասեր, ինչպիսին, օրինակ, սովորողի արժեհամակարգի ձևավորումն է: Այստեղ կարևոր է նաև ինքնակրթությամբ զբաղվելը:

Ինքնակրթությունը կրթության բարձրագույն և լավագույն ձևն է: Այսօր ինքնակրթության դար և անսահաման մեծ են միջոցները. համացանց, հեռուստատեսություն, ռադիո, հոգևոր կայքեր, ֆիլմեր, գրքեր:

Այսօր երեխաներն անհամբեր են, կեսից հանձնվում են, ձանձրանում: Իրենց թվում է, թե ամեն բան այս կյանքում պետք է կառուցված լինի «այստեղ և հիմա» սկզբունքի հիման վրա: Այսինքն՝ մի գործ արեցիր, իսկույն պետք է փոխհատուցվես: Աշակերտի մեջ պետք է սերմանել ոչ նյութական արժեքներ ձեռք բերելու ունակություն, բացատրելով, որ մարդկանց ուզում են փոքրացնել, խռովեցնել, բաժանել, որպեսզի կարողանան տիրել: Թեև միշտ լսում ենք, որ մարդը կարևոր է, սակայն, երբ որ երբ մարդուն ասում են՝ դու կարևոր ես, նշանակում է, այդ մարդուց ուզում են դրամ կամ մեկ այլ բան շորթել: Մարդուն ամեն կերպ ուզում են նյութապաշտ և խեղճ դարձնել:

Այստեղ օգնության է գալիս արժեհամակարգ հասկացությունը, ուսուցումը, ճիշտ մատուցումը:

## **Գլուխ2 Սովորողների մեջ արժեհամակարգի ձևավորումը որպես արդի մանկավարժության կարևոր պահանջ**

Ուսուցչի քաղաքացիական դիրքորոշումը, ձգտումը՝ դաստիարակել բարձր արժեքներ կրող քաղաքացիներ, նրա մտահորիզոնը, հասարակական լայնախոհությունը, սերը երեխաների նկատմամբ ուսումնական գործընթացի արժեքային դաստիարակչական ներգործության բարձրացման կարևոր պայմաններից են: Ընդ որում՝ դաստիարակչական խնդիրների լուծումը պայմանավորված է նաև նրանով, որ ուսուցիչը համագործակցային փոխհարաբերությունների միջոցով նախատեսում է աշակերտների ոչ միայն մտավոր, այլև բարոյական, գեղագիտական ու ֆիզիկական դաստիարակության խնդիրների նկատմամբ համակողմանի մոտեցում: Դրա համար յուրաքանչյուր դասի դաստիարակչական խնդիրների լուծումը նախատեսում է ոչ թե մեկուսացված կամ առանձին մոտեցում, այլ գիտելիքների ու կարողությունների, արժեքային որակների, կամքի, բնավորության, զգացմունքների, հոգեբանական տարբեր դրսևորումների միաժամանակյա և փոխկապակցված մոտեցում: Յուրաքանչյուր դասի ժամանակ ուսուցիչը պետք է որոշակի դաստիարակչական խնդիրներ լուծի՝ հաշվի առնելով տվյալ առարկայի և թեմայի ուսումնասիրման հիմնական խնդիրները: Ուսուցիչը ուսուցման կազմակերպման տարբեր ձևերի ընտրության միջոցով (անհատական, խմբային, էքսկուրսիա, դասդեկական ժամ, արտադասարանական միջոցառումներ և այլն) առավել արդյունավետ է դարձնում աշակերտների արժեհամակարգային դաստիարակչական խնդիրների լուծումը: Օրինակ՝ հասարակագիտության դասաժամերին խմբային աշխատանքի ժամանակ աշակերտները սովորում են ուշադրությամբ վերաբերվել միմյանց, միասին հաղթահարել դժվարությունները, միասին ձեռք բերել հաջողություններ, լսել հակադիր կարծիքներ, ընդօրինակել միմյանց և այլն: Հասակակիցների խմբում աշակերտն ավելի ազատ է արտահայտում իր մտքերն ու դատողությունները, գործում է անկաշկանդ, ինչն էլ նպաստում է ուսուցման արդյունավետ կազմակերպմանը: Անհատական աշխատանքում դաստիարակվում է աշակերտների ինտելեկտուալ պատրաստականությունը, դժվարությունները հաղթահարելու գործում, ձևավորվում են համառության,

ինքնակազմակերպման և ինքնավերահսկման ընդունակություններ: Հատկապես դեռահասներին առանձնահատուկ զգացմունքայնությունը, ինքնասիրությունը, որ հաճախ արտահայտում է նրանց ինքնահաստատման և հասուն երևալու ձգտումը, մանկավարժից պահանջում է անհրաժեշտ նրբանկատություն, հարգանք դեռահասի անձի նկատմամբ: Ելնելով վերոգրյալից՝ կարող ենք եզրահանգել, որ արժեքային համակարգի ձևավորումը ժամանակակից դպրոցի գերխնդիրն է և մշտապես պետք է լինի մանկավարժների ուշադրության կենտրոնում: Պատմությամբ ապացուցված է՝ այն պահին, երբ հայ ժողովուրդը հավատարիմ է եղել ազգային արժեհամակարգին, հավաքական ոգին ավելի մեծ հաջողություններ է արձանագրել, դիմագրվել է տարբեր փորձությունների: Ազգի, պետության գոյության հիմնասյուններն են՝ եկեղեցի, ընտանիք, մշակույթ, լեզու, արժեհամակարգ, սակայն տեսնում ենք՝ այսօր խորքային փոփոխություններ կատարելու միտում կա՝ հենց այդ ոլորտներում: Եթե սրանք չպահպանվեն, ազգի գոյաբանական, ազգի, պետության գոյության խնդիր է առաջանում:



### **Գլուխ3 Արժեհամակարգի դասավանդման մեթոդական հասարակագիտության դասաժամերին**

Սեփական երկրի նկատմամբ արժեհամակարգի ձևավորումը սկսվում է դեռևս ընտանիքից: Իսկ արդեն աշակերտական նստարանին այն արժևորվում և մեծագույն պատասխանատվություն է արմատավորվում: Մեր սերունդը դասագրքերով չէ, որ պիտի իմանա, թե ինչ է սեփական երկրի շահը պահելն ու պաշտպանելը, քանզի նա իր աչքով է տեսել ու ցավոք տեսնում է դրա հետևանքները: Շատ կարևոր է իրական արժեքանական արժեհամակարգի ճիշտ ընկալման հիմնահարցերի լուսաբանումը, որով էլ պայմանավորված է շրջապատում իրական արժեքների նկատմամբ ճիշտ ու համարժեք վերաբերմունքի դրսևորումը: Վերջին ժամանակներում շատ կարևոր է վեր հանել արժեքի հատկանիշները, բացահայտել, արժեքի էությունը, արժեքանական ընկալումները, առանձնահատկությունները, հիմնական բնութագրիչները, հասկացություններն ու գիտական հիմնավորումները: Հասարակության մեջ տեսականորեն ամրագրված արժեքները վերաիմաստավորվում են մարդկանց առօրյա կյանքում: Այդ ամբողջ գործընթացի իրականացման մոդելը մեր պատկերացմամբ հետևյալն է.

1. Պատմականորեն ձևավորված և սերնդեսերունդ փոխանցված արժեքների ամրագրումն ամենուր և հատկապես հանրակրթության ոլորտում

2. Արժեքների ճիշտ ընկալումը

3. Արժեքների իրացման համար երաշխիքների ապահովումը

Այս համատեքստում տեղին ենք համարում կատարել մի շարք կարևոր ռազմավարական նշանակություն ունեցող շեշտադրում. ձևավորել և ամրագրել անցյալի արժեքների արժեքանական ժառանգությունը, արդի պահանջներին համապատասխան կիրառելու գործնական ունակությունների ձեռքբերումը, որը համարվում է հանրակրթության ոլորտի հիմնական գերխնդիրը: Այսպիսով ազգային արժեհամակարգով ձևավորված սերունդը կունենա արժանապատիվ ապագա: Հավատարիմ մնանք մեր ազգային արժեհամակարգին, ազգային մտածելակերպին և վստահորեն կերտենք փայլուն ապագա, ամրագրելով մեր հաղթանակները: Այսօր շատ կարևոր է կրտսեր դպրոցականների արժեքային

կողմնորոշումների ձևավորման էության բացահայտումն ու զարգացումը: Կրտսեր դպրոցականների արժեքային կողմնորոշումների ձևավորման էության բացահայտումը մանկավարժական ներգործության տեսանկյունից ենթադրում է այդ գործընթացի դիտարկումը նրա բովանդակային բաղադրատարրերի ամբողջության մեջ: Ուսուցման պայմաններում արժեքային կողմնորոշումների ձևավորման գործընթացն երկկողմանի բնույթ ունի. այդ գործընթացի արդյունավետության վրա ազդում են և՛ արժեքների յուրացման նկատմամբ սովորողների մղումն ու ակտիվ գործունեությունը, և՛ այդ գործընթացը կազմակերպող ուսուցչի գործունեությունը: Սովորողների մեջ արժեքային կողմնորոշումների ձևավորման իրականացման գործընթացի բովանդակային կողմը ներառում է նրանց հոգեկանում գերակա արժեքները, ինչպես նաև մանկավարժական ներգործության միջոցների համալիրը, որն ակտիվացնում է դպրոցականի՝ արժեքների յուրացմանը միտված գործունեությունը:

#### Գլուխ 4. <<Կոռուպցիա>> թեմայի ուսուցման մեթոդը որպես արժեքային համակարգի ձևավորման կարևոր միջոց

XXI դարի մուտքը հայաստանյան դպրոցներում համընկավ քննադատական մտածողության զարգացման ներդրմամբ:

Այն հիմնականում մշակված է հասարակագիտական առարկաների համար, սակայն դասավանդման եռափուլ համակարգը (ԽԻԿ) հնտորեն կիրառելու դեպքում, այն զարգացնում է քննադատական մտածողության (ՔՄ) կարողություններ ինչպես բնագիտական առարկաների, այնպես էլ մաթեմատիկայի դասավանդման ժամանակ: Միաժամանակ ՔՄ մեթոդների կիրառությունը մեծացնում է ուսուցիչների պատասխանատվությունը՝ ավելի ճիշտ գնահատելու աշակերտների մտածողության որակը և քննողաբար վերաբերվելու իրենց իսկ դասավանդման մեթոդաբանությանը:



Ստորև ներկայացվում են ՔՄ մեթոդների կիրառմամբ.

Դասի նպատակը`

Մահմանել կոռուպցիա երևույթը ,

ճանաչել կոռուպցիայի դրսևորումները և գծապատկերել :

Դասի ընթացքը` I փուլ /խթանում/

Ուսուցիչը <<մտավոր գրոհ>> մեթոդով աշխատում է վեր հանել դասի կարևոր կետերը, թվել կոռուպցիայի պատճառները, դրսևորման ձևերը, որոնք առկա են մեր շրջապատում : Այնուհետև աշակերտների ուշադրությունը սևեռում է հետևյալ հարցերի վրա .

1.Ի՞նչ գիտեք կոռուպցիայի մասին:

2.Որո՞նք են կոռուպցիայի հետևանքները:

3.Ի՞նչ օրինակներ գիտեք կոռուպցիայի մասին :

Աշակերտների արտահայտած բոլոր մտքերը խմբավորվում են: Ժամանակակից տեղեկատվական տեխնոլոգիաների կիրառումը մեծ հնարավորություն է տալիս անհատական և խմբային աշխատանքները կազմակերպելիս, կարճ ժամանակամիջոցում ծանոթանալու աշխատանքային և տեխնոլոգիական վերջին նվաճումներին, առաջարկում է նոր ձևեր և ուղիներ` առարկայի դասավանդման գործընթացում, կիրառելի է դարձնում առավել մատչելի և հասանելի ուսուցողական և ճանաչողական նշանակության նյութեր, տեսաերիզներ, ֆիլմեր: Տեղեկատվական-հաղորդակցական տեխնոլոգիաների շնորհիվ սովորողները դառնում են տեղեկատվության ազատ սպառողներ` անմիջական կախվածություն չունենալով դասագրքային նյութերից, որը հնարավոր է իրականացնել դասարանական և արտադասարանական աշխատանքներ :

#### **4.1 Խմբային աշխատանքների կազմակերպման առանձնահատկությունները, ուսումնական գործընթացի տեսակները:**

Խմբային գործունեության անհրաժեշտ պայմաններն են՝ ազատ հաղորդակցումն ու շփումը, դիմացիին լսելու, հասկանալու, մտածված պատասխան տալու կարողությունը, հան-դուրժողականությունը, համագործակցությունը, իր և խմբի անդամների ուսումնառու-թյան, աշխատանքի և հաջողության համար պատասխանատվությունը: Գործունեության ձևերն են՝ համատեղ հետազոտական և ստեղծագործական աշխատանքը, միասին զրույցներ, բանա-վեճեր, քննարկումներ, շնորհանդեսներ, մրցույթներ նախա-պատրաստելը և իրականացնելը: Խմբային աշխատանքների գործունեությունը հիմնականում իրականացվում է ուսում-նասիրվող հիմնական թեմաների շուրջ կառուցված՝ պարզից բարդ ուղղորդող վար-ժություն-ների, գծագրերի, պատկերների, համեմատությունների կա-տարմամբ: Ելնելով սովորողների տարիքային և հոգե-բանական առանձնահատկություններից, փոխվում է առար-կայի ուսուցման նպատակները, խնդիրները: Համագործակցություն խմբերում: Աշակերտները պետք է հասկանան, որ իրենց հաջողությունը կախված է խմբի բոլոր անդամների ներդրումից: Նման խմբերին բնորոշ է թիմային աշխատանքի ոգին, ընդհանուր նպատակին հասնելու համար առավելագույնն անելու ցանկությունը, փոխկախվածությունն ու փոխկապվածությունը, սոցիալական փոխազդեցության հմտությունները, խմբի աշխատանքի ընթացքը և արդյունքը մշտապես գնահատելու և վերանայելու կարողությունը: Ուսուցչի խնդիրն է՝ առաջադրանք-ները կառուցել այնպես, որ սովորողները համագործակցելու կարիք ունենան: Այս մեթոդը նախատեսում է դասարանի աշակերտներին խմբերի բաժանել, ովքեր հանձնարարված առաջադրանքները կատարում են խմբով: Օրինակ՝ մեկ խումբը նախագծում է, մյուսը՝ մոդելավորում, երրորդը՝ կազմակերպում տեխնոլոգիական մշակման աշխատանքները: Խմբային (համագործակցային) մեթոդն ակտիվացնում է աշակերտներին, բարձրացնում նրանց հետաքրքրասիրությունը կատարվող աշխատանքի նկատմամբ: Խմբային գործունեությունը ենթադրում է խմբային աշխատանքի համագործակցություն: Համագործակցային ուսուցման կարևոր պայմաններից է խմբի անդամների միջև դրական աջակցող փոխկախվածության ապահովումը:

Դիտարկենք համագործակցային ուսուցման տարրերը.

Դրական փոխկախվածություն: Խմբում ձևավորվում է միմյանց օգնելու, խրախուսելու, աջակցելու մթնոլորտ: Սովորողի ջանքերն ուղղվում են համատեղ հասնելու ընդհանուր նպատակին: Այն նպաստում է հանդուրժողականության և վստահության ձևավորմանը: Քննարկումներն ու ձգտումներն օգնում են խմբի անդամների փոխհարաբերություններին:Դեմառդեմ, խթանող փոխազդեցություն: Խմբի անդամները համագործակցում են, փոխանակում են տեղեկություններ, կարծիքներ և ռեսուրսներ, մշակում և վերլուծում են տեղեկությունը, ապահովում են հետադարձ կապ, քաջալերում և աջակցում են միմյանց՝ ընդհանուր նպատակին հասնելու :Հասարակագիտության դասերին դասի մասնակցային սկիզբ ապահովող մեկ այլ մեթոդներից մեկը մտազրոհի թվային տարբերակը (նորույթ է մտազրոհի թվային տարբերակը menti.com կայքի միջոցով): Աշակերտները նախապես իրենց հեռախոսներով հավաքում են կողը և սկսում են պատասխանել ուսուցչի հարցին(նման է՝ <<Ո՞վ է ուզում դառնալ միլիոնատեր>> հեռուստատեսային խաղին):

Օրինակ՝ ուսուցչի հարցը կարող է հնչել հետևյալ կերպ. Ո՞ր արժեքների համար պետք է պայքարենք ամեն օր:Էկրանին երևում է մտքերի տարափ : Ուսուցիչը կարդում է և միասին քննարկում են անցկացնում համագործակցային մեթոդներով: Բանավեճային քննարկումները հատկապես արդյունավետ են 9\_12 դասարաններում:Աշակերտները բաժանվում են 2 խմբերի՝ կողմ և դեմ,որն ընտրվում է վիճակահանությամբ:Կողմ թիմը թեմայի վերաբերյալ կառուցողական էլույթ է նախապատրաստում, դեմ թիմը հակառակ փաստարկներ է բերում:Բանավեճային քննարկման ժամանակ շատ կարևոր էթիկայի նորմերի պահպանումը, միմյանց կարծիքը լսելը, չընդհատելը:Կողմ թիմը թեմայի վերաբերյալ կառուցողական էլույթ է նախապատրաստում, դեմ թիմը հակառակ փաստարկներ է բերում:Բանավեճը կարող է տևել ամբողջ դասաժամ:Կարելի է շրջանակները ընդլայնել և ,օրինակ, բանավեճ կազմակերպել մեկ այլ դասարանի աշակերտների հետ՝ ընտրելով նախապես թեման, լրացուցիչ տեղեկություններով:Հետաքրքիր օրինակ է երբ 9\_րդ դասարանի աշակերտները բանավիճում են <<Կոռուպցիա shift+delete>> ծրագրի շրջանակներում, թեման՝ <<Կոռուպցիան հնարավոր չէ արմատախիլ անել կրթական

հաստատություններում>> կամ <<Համայնքապատկան կառույցներում հովանավորչությունը կրում է շարունակական բնույթ>>:Բանավիճելու ընթացքում վեր են հանվում կարևոր գաղափարներ, աշակերտը սովորում է , որ կոռուպցիան փչացնում է, խեղում է հասարակությունը:Վերհանելով խնդիրը ` փորձում է լուծում առաջարկել:Նրա մոտ ձևավորվում է նոր վերաբերմունք` արդար և առանց կեղծիքի , կաշառքի, հովանավորչ ության հասարակություն ունենալու միտումները:Խոսող, քննարկվող, բանավիճող, նոր գաղափարներ վերհանող աշակերտը դառնում է իր պետության մասին մտահոգվող չօտարված անհատ և ձևավորում է ազնիվ , ճշմարիտ արժեհամակարգ:

Մենք` ուսուցիչներս պետք է կարողանանք դասապրոցեսի ընթացքում օրինակներով և իրավիճակին նկարագրություններով ցույց տալ բարու և չարի, արդարի և անարդարի տարբերությունները, հասնենք նրան, որ աշակերտը սեփական դիրքորոշում ունենա, վերլուծի փաստերը, համեմատի, գնահատի, արժևորի և արդյունքում ձևավորի քննադատական մտածողություն:Խմբի յուրաքանչյուր անդամ պատրաստ է պատասխանելու և մտքեր փոխանակելու, կրում է պատասխանատվություն` ուսուցման արդյունքների համար, խմբի մաս է, գաղափարներով և մտքերով կիսվում է մյուս անդամների հետ, պատրաստ է ներկայացնելու խմբի աշխատանքի արդյունքը:Սոցիալական հմտություններ: Խմբի անդամների միջև ձևավորվում են վարքագծային նորմեր` անաղմուկ աշխատանք, ներկայություն մինչև աշխատանքի ավարտը, խոսողին հետևելը, առաջադրանքը կատարելիս ներդրում ունենալը:Ուսումնական գործընթացում, ելնելով` թեմայի բովանդակությունից, դասի նպատակից, դասարանի, սովորողների, քննարկվող հիմնախնդրի առանձնահատկություններից, առկա հնարավորություններից և այլ հանգամանքներից, կարող են ընտրվել ուսումնական գործունեության հետևյալ տեսակները`

- ուսումնական նյութի բացատրում,
- ինքնավերլուծություն, զրույցներ ու հարցազրույցներ,

- աշխատանք տպագիր և էլեկտրոնային սկզբնաղբյուրների հետ՝ գիտական բազային գործիքների օգտագործմամբ (մեջբերումներ, հղումներ, ամփոփումներ, եզրակացություններ, առաջարկություններ):
- զանգվածային լրատվամիջոցներից ստացված տեղեկատվության վերլուծություն, աղբյուրների գնահատում և համադրում,
- հիմնախնդիրների հետազոտում,
- հանդիպումներ,
- մրցույթների անցկացում,
- հաշվետվությունների և էսսեների պատրաստում,
- բանավեճերի կազմակերպում,
- S2S կիրառմամբ թվային գործիքների օգտագործում,
- դերային խաղեր,
- թղթապանակների պատրաստում, մեկնաբանում,
- անհատական ու խմբային, ինքնուրույն և համագործակցային, աշխատանքների կատարում,
- անդրադարձ ուսումնական գործունեությանը:

### **Եզրակացություն**

Մենք՝ ուսուցիչներս, ունենք բացառիկ առաքելություն սերունդներին թողնել մեր երազած հայրենիքը, որի համար պետք է լինի մեր ամենօրյա աշխատանքն ու նվիրումը:

Տասնամյակներ շարունակ մեր արժեհամակարգում իշխել է կեղծիքը, սուտը, կոռուպցիան:



Պետք է ստեղծենք այնպիսի համակարգ, որտեղ աշակերտի համար գիտելիք ստանալը դառնա նոր արժեք ստեղծելու նախապայման և նա վստահ լինի, որ գիտելիքը ուժ է, և այդ ուժը ստեղծելու է բարիք իր և իր հայրենիքի համար:

ԵՎ այդ ամենը պետք է ստեղծենք ուսուցիչներս վաղվանից՝ չսպասել որ որևէ մեկը մեզ համար լավ երկիր է կառուցելու: Պետք է հասնել նրան, որ յուրաքանչյուր աշակերտ գիտակցի , որ իր հայրենիքը , իր պատասխանատվությունը չի ավարտվում իր տան նախամուտքով, և որ իր բակը , իր փողոցը ունի իր խնամքի ու հոգատարության կարիքը: Աշակերտի արժեհամակարգում պետք է հեղափոխություն կատարվի , որտեղ գերիշխող ը պետք է լինի ազատությունը, ճշմարտությունը, արդարությունը: Հասարակագիտություն առարկան թույլ է տալիս բազմաթիվ մեթոդներ կիրառել դասի ընթացքում , բերել օրինակներ առօրյա կյանքից , գտնել լուծումներ խնդիրներին , բացահայտել նորը:

## Օգտագործված գրականության ցանկ

Arlis.am Հանրակրթության առարկայական չափորոշչային վերջնարդյունքները և օրինակելի ծրագրերը

12\_րդ դասարանի հասարակագիտության դասագիրք \_\_ Երևան 2016

Կարողունակությունների կողմնորոշիչ շրջանակ՝ ժողովրդավարական մշակույթի համար, (Եվրոպայի խորհուրդ, դեկտեմբեր 2020, (հայերենհրատարակություն) (Եռահատոր շարք) էջ 43

Օրինակներ սեփական մանկավարժական գործունեությունից՝ ելնելով <<Կոռուպցիա>> թեմայից

Ս. Գևորգյան \_<<Ազգային կրթության դերն ու նշանակությունը սովորողների հայեցի դաստիարակության գործընթացում, Երևան 2002, էջ 65

<https://Mediamax.am>

<https://qahana.am.post>

<https://menti.com>